















L E  
M A R E S C H A L  
E X P E R T :

TRAICTANT DV NATVREL, ET DES  
MARQVES DES BEAVX ET BONS CHEVAVX,  
de leurs maladies & remedes d'icelles.

AVEC VN EXAMEN ET FORME DE L'ESTAT  
de Marefchal, Et une description de toutes les parties & offemens  
du Cheual, representez en figures.

Par feu **NICOLAS BEAVERAND**, M<sup>e</sup> Marefchal à Paris.

Dedié à **MONSEIGNEVR le Duc de MONTBAZON.**



**A P A R I S,**

De l'Imprimerie de **CLAUDE HULPEAU**, rue  
Mauconseil, près l'Hostel de Bourgogne.

**M. DC. XIX.**

AVEC PRIVILEGE DV ROY.







A TRES-HAUT,  
ET  
TRES-PVISSANT

SEIGNEVR, M<sup>RE</sup> HERCVLES DE  
ROHAN, DVC DE MONT-BAZON, PAIR ET  
grand Veneur de France, Lieutenant general pour  
le Roy au païs de Picardie, au Comté & Euesché  
de Nantes, Capitaine & Gouverneur des Ville &  
Citadelle d'Amiens.



ONSEIGNEVR,

Le desir que i'ay de tesmoigner à vostre Excellence combien ie l'honore, a rencontré vne occasion assez conuenable; pour le manifester, en vous Dédiant vn petit Liure, qui m'a esté mis  
és mains par la veufue de feu Nicolas Beaugrand ( qui pendant qu'il viuoit ) eut l'honneur de vous seruir en sa vacation de Mareschal: son intention fut de le vous Dédier, i'accomplis icelle, la mort l'ayant preuenue ne luy donna le loisir de parfaire son entreprise, & de mettre la derniere main à son liure, que i'ay intitulé le Mareschal Expert, pource qu'il traite de tout ce que doit scauoir celuy qui fait profession de cet art, soit pour cognoistre les signes & les marques des bons Cheuaux, s'ils sont de bon seruice, s'ils ont quelques vices, de-faux ou imperfections, & pour les soulager en leurs infirmités, maladies, & accidens, par des bons & approuuez remedes: ce qui est grandement necessaire & vtile à toutes les Republicques, tant pour cul-



# EPISTRE.

*riuer & labourer la terre, afin qu'elle puisse fournir d'aliments à ses creatures, que pour mettre vne gendarmerie sus pied pour se deffendre aux occurrences qui arriuent. Aristote, Apirte, Theophraste, Pelagon, Diophane, Hyppocrate, & infinis Auteurs Grecs, considerans les seruices, le secours, & les commoditez que les hommes recoient des Cheuaux, n'ont dédaigné de mettre la main à la plume en leur faueur pour leur subuenir en cas de necessité & de maladie, communiquant au public: pour cet effect la Medecine Hippiatrice ou Cheualine, qu'ils auoient heureusement inuentée. Leur travail a fort obligé les siecles passez, & cestuy-cy ayant trouué la maniere, ou pour mieux dire l'art de guerir les Cheuaux des maux à quoy ils sont sujets. Sans ceste inuention le monde auroit esté beaucoup incommodé, les Cheuaux luy venant à manquer & defaillir, à faute d'estre promptement assistez & secourus à leur besoin, ma recherche a beaucoup contribué de son temps pour rendre ce Liure suffisant de seruir au public, & de sortir en lumiere sous l'autorité de vostre tres-illustre Nom & des Tiltres que vostre tres-heroique Race & vos vertus vous ont glorieusement acquis, permettez, MONSEIGNEVR, qu'il soit vostre, & qu'il se conserue souz la protection de vos Palmes, & de vos Lauriers parmy le monde, à celle fin que ceux qui se seront seruy avec heureux succez des bons remedes qu'il contient, vous en rendent graces infinies, comme ie fais en toute humilité de ce que vostre Excellence le daigne recevoir, avec l'offre du seruice que vous veüez,*

**MONSEIGNEVR,**

**Vostre tres-humble &  
tres-obeissant seruiteur,  
CLAUDE HVLPEAU  
Imprimeur.**





AV MESME SEIGNEVR,

SONNET ACROSTICHE.

**H**ercule, tant de nom, que d'effect; receuez  
**E**n bonne part ce liure; vtile & necessaire,  
**R**ecommandable il est, à vous seul il veut plaire,  
**C**'est tout l'heur qu'il attend, si bon vous le trouuez,  
**V**ous portez de l'Amour aux lettres, & pouuez  
**L**es aduancer en biens, & des faueurs leur faire:  
**E**n vous les vertus ont vne ame debonnaire,  
**D**ignes des grâds hōneurs, qu'à bon droict vous auez.  
**E**ncore n'est-ce rien au prix de vos merites,  
**R**ecognus d'un chacun, vos loüanges escrites  
**O**nt semé vostre nom par ce large Vniuers:  
**H**ercule le Thebain n'en eut pas dauantage,  
**A**uec luy vous allez du pair: son grand lignage  
**N**i ses faits, plus que vous n'eurent des Lauriers verds.






# TABLE,

## DE CE QVI EST CONTENV E'S CHAPITRES DE CE PRESENT LIVRE.

### CHAPITRES.

I.	 E l'excellence du Cheual.	page 1.
II.	Examen & forme de l'estat de Mareſchal, où le maiſtre interroge le compaignon.	p. 4.
III.	Les marques que doiuent auoir les bons Cheuaux.	pag. 12.
IIII.	Receptes, & premierement pour le farcin.	pag. 14.
V.	Recepte pour la galle aux cheuaux.	pag. 19.
VI.	Recepte pour vn cheual gras fondu à cauſe de la gran- de fièvre & chaleur qu'il a, pour le grand effort qu'il a fait.	pag. 21.
VII.	Recepte pour vn cheual morueux.	pag. 22.
VIII.	Recepte pour vn cheual pouſſif, tirée de monsieur de Iunigny, Eſcuyer.	pag. 23.
IX.	Recepte pour les grappes & porreaux.	pag. 26.
X.	Recepte pour oſter vn ſubrot.	pag. 28.
XI.	Recepte pour malandres.	pag. 29.
XII.	Recepte pour vn cheual qui a les nerfs foullez & fe- ruz, & pour garder ledit cheual de broncher.	p. 30.
XIII.	Recepte pour vn cheual qui a les jambes enflées, & ne paroiffant rien que ladite enfleure.	pag. 31.
XIV.	Recepte pour courbes & eſparuins.	ibidem.
XV.	Recepte pour mulles traueſſines.	pag. 32.
XVI.	Recepte pour faire vne emmiellure pour charger vn cheual des quatre jambes.	ibidem.
XVII.	Recepte pour faire vne medecine à vn cheual mor- fondu.	pag. 33.
XVIII.	Recepte pour faire des pillules pour purger vn che- ual.	pag. 34.
XIX.	Recepte pour faire des pillules pour vn cheual qui touſſe, & eſt morfondu.	ibidem.



# T A B L E.

XX.	Recepte pour vn cheual qui a le ventre alteré.	p. 35.
XXI.	Recepte pour vn cheual qui a estranguillō ou gourme.	ib.
XXII.	Recepte pour faire vn arman à vn cheual malade.	p. 36.
XXIII.	Recepte pour vne medecine confortatiue à vn cheual fort malade.	ibidem.
XXIIII.	Recepte pour faire vn clistere laxatif.	p. 37.
XXV.	Recepte pour faire vn clistere restraignant & r'af- fraichissant.	ibidem.
XXVI.	Recepte pour vn cheual qui a contre-cœur.	p. 38.
XXVII.	Recepte pour vn cheual qui est espaulé & entre-ou- uert.	ibidem.
XXVIII.	Recepte pour vn cheual qui a vne maladie comme fol, se donnant de la teste contre les murailles, & est comme enragé.	pag. 40.
XXIX.	Recepte pour vn cheual eshanché.	pag. 41.
XXX.	Recepte pour faire venir du boyau à vn cheual, pourueu qu'il soit jeune.	pag. 42.
XXXI.	Recepte pour les playes arrinées aux cheuaux.	ibid.
XXXII.	Recepte pour vn cheual qui a la veue chargée, & non tayée.	ibidem.
XXXIII.	Recepte pour vn cheual encloië.	pag. 44.
XXXIIII.	Recepte pour les tallons encastellez, & pour attain- tes sourdes.	ibid.
XXXV.	Recepte pour vn cheual qui a vne forme sur le sabot.	ib.
XXXVI.	Recepte pour mal de pied, où il y a os de graisse ou filandres tenans au petit pied.	pag. 45.
XXXVII.	Recepte pour les saimes.	p. 46.
XXXVIII.	Recepte pour faire Egyptiacum noir.	ibidem.
XXXIX.	Autre recepte pour faire Egyptiacum.	p. 47.
XL.	Recepte pour faire remolade & reconfortement pour les pieds solbattus.	ibidem.
XLI.	Recepte pour faire vn retoire.	ibidem.
XLII.	Recepte pour faire vn vnguent, & faire venir la corne aux pieds des cheuaux.	pag. 48.

F I N D E L A T A B L E.





✱ Tel fut **BEAUGRAND**, dont voicy le pourtrait,  
 Tant ce qu'il sçent est compris dans son liure,  
 Pour profiter imprimer il l'a fait:  
 Afin qu'il peust apres son deceds viure. -





L E

# MARESCHAL EXPERT:

QVI MONTRE ET ENSEIGNE TOVT  
CE QVI EST NECESSAIRE EN CET ESTAT,  
TANT POVR CONNOISTRE LES MARQUES QUE DOI-  
uent auoir les beaux & bons Cheuaux, & leur naturel, que  
pour les guerir de toutes les maladies, infirmitéz, & accidens  
ausquels ils sont sujets, par vnguens & remedes approuuez,  
& pratiquez par l'experience des plus braues & excellents  
en la profession de la medecine Hippiatrice ou Cheualine.

AVEC VN EXAMEN ET FORME DE L'ESTAT  
*de Marechal, Et vne description de toutes les parties & osse-  
mens du Cheual, representée en figures.*

---

## CHAPITRE I.

### DE L'EXCELLENCE DV CHEVAL.



A nature est admirable en ses œuures, &  
l'homme luy doit de grands remerci-  
ments, de ce qu'elle s'est si bien accom-  
modée avec luy pour toutes ses necessi-  
tez, & quelle a procréé pour son seruice  
le Cheual entre tous les animaux le plus necessaire, &  
qui recognoist mieux son maistre: le tant renommé



cheual Bucephale fert d'exemple: car il ne se laissoit monter à autre qu'à Alexandre, & sembloit se glorifier lors qu'il portoit vne si glorieuse & genereuse charge, & dit-on qu'estât blessé à la prise de Thebes, il ne laissa de le porter courageusement dedás la mêlée des cōbatás, sans se soucier de la perte de son sang, desirant le seruir iusques à la fin de ses forces, & luy pourchasser par sa resoluë perseuerâce quelque aduantage victorieux sur ses ennemis. Le cheual de Cæsar ne le reconut pas moins. Celuy de Denis le Tyran, ayant esté abādonné par luy en certain conflict, suiuit les vestiges de la fuitte, & tout faigneux & fangeux qu'il estoit, retourna dedans son Escurie. Centaurete de Galatie voulant faire brauade sur le cheual d'Anthiocus, qu'il auoit occis, éprouua à son mes-advantage qu'il auoit du ressentiment de la mort de son maistre, ce cheual sentant ce nouveau cheuauteur sur luy, ne cessa de se traualier, cabrer & dresser, prenant le mord avec les dents, s'elāçant, qui ça, qui là, avec telle impetuosité qu'il le tomba par terre, puis luy dōna tant de coups de pieds qu'il ne triompha gueres sur sa monture, mourant des coups & de la cheute qu'il auoit eue. Nicomedes Roy de Bithinie eut vn cheual duquel il fut tant aymé, que le voyant decedé il refusa de prendre sa pitance ordinaire, & ne voulut manger en aucune maniere, si bien qu'il se denua de forces par la disette qu'il endura, pour la tristesse du trespas de son Seigneur, & mourut. Virgille faict vn honorable recit d'Æthon, le cheual de Pallas fils d'E-uandre, & dit qu'il pleuroit de douleur aux funerailles de son maistre, lisez ces vers,

*Après alloit Æthon, cheual bon pour les armes,  
Pleurant & humectant sa bouche de ses larmes.*



Silius Italicus en son neufiesme liure, extole grandement deux cheuaux, Pelore & Cirée, parlant d'eux en cette sorte,

*A la main & au frein Pelore estoit docile,  
Sur tout obeissant, & de taille gentile,  
Cirée oyant la voix de son maistre aussi-tost,  
Deuant les regardans fendoit le vent dispost.*

La docilité & l'amour que le cheual porte à l'homme, a occasionné plusieurs grands personnages de le reciproquer par l'erection des statuës, & edification de villes. Alexandre cy-dessus nommé, fonda vne ville en l'honneur de Bucephale & luy imposa son nom, & luy fait faire des obseques. Les Agrigentins dresserent des Pyramides & des Sepulchres aux cheuaux qui les auoient bien seruis. Octauius Cæsar & apres luy l'Empereur Adrian fait inhumer des cheuaux en grande pompe & solemnité, & des Epitaphes furent cizelées sur leurs monuments. L'Empereur Commode fait le semblable à son cheual Prasinus, & voulust qu'on l'ensepultura au Vatican. Romulus institua des jeux nommez Equitia, en faueur des cheuaux, & les representoiet au champ de Mars. Les Æthiopiens faisoient tant de cas de ces nobles animaux, qu'ils armoient leurs testes de la peau de la leur, & y laissoient les oreilles, & portoient leurs queuës en forme de pennaches. Infinies nations n'en ont pas fait moins, & les ont eu en tres-grande reuerence, vn Empereur Romain fait son cheual Sénateur. Les Astrologues leur ont pareillement tant deferé qu'ils en ont placé vn aislé parmy les signes celestes. Les Poëtes tiennent que la fontaine où les Muses se lauent & estanchent leur soif, est venue d'vn



coup de pied, que le cheual Pegase donna contre le mont de Parnasse. Neptune est surnommé Hippius, à cause que le premier cheual qu'on ait jamais veu, print de luy son origine, ou d'une pierre sur laquelle il avoit épandu son eau: Il reste plus à dire du cheual, qu'il n'en a esté dit: Mais pour eiter prolixité, ce chapitre finira, pour entrer en la continuation de ce que l'Auteur de ce liure desire traiter.

---

## CHAPITRE II.

EXAMEN ET FORME DE L'ESTAT DE  
*Mareschal, où le Maistre interroge le Compagnon.*

## DEMANDE.

**Q**V'EST-CE que l'art de Mareschal?

## RESPONSE.

SCIENCE, experience, cognoissance & œuvre de main.

D. Qu'est-ce que œuvre de main?

R. - C'est bien chauffer le fer, le bien souder, bien forger, bien ferrer, bien cauterizer, bien seigner, estre adroict & hardy à bien penser vn cheual des accidens qui luy peuvent survenir.

D. Qui sont les membres principaux de l'animal?

R. Il y en a trois, que si en ces trois l'animal est gaste, comme du foye, du cœur & du cerueau, qui est au sommet du chef, ie dis qu'il en mourra, & si est gaste des genitoires on peut les luy couper, où les luy faire tomber par bons moyes, & peut estre qu'il n'en mourra pas, sauf qu'il perdra son naturel, quant au germe d'engendrer.



D. Qu'est-ce qui part de la teste du cheual, & qui va respandre par tous les autres membres?

R. Ce sont nerfs blancs qui ont vne ligature au bout du nez, & prennent leur estenduë le long du col, & le long du corps, & faisant leur estenduë aux quatre jambes, prennent leurs ligatures dans les quatre pieds.

D. Quelle chose est-ce que sang principal & vital?

R. Ce sont veines, qui sont vaisseaux du sang meü, qu'on appelle sang vital.

D. Qu'est-ce qu'on appelle sang vital?

R. C'est que quand l'animal dort, tousiours son sang trauaille & jamais ne cesse.

D. Combien l'animal à il de veines.

R. Vne.

D. Quelle est elle?

R. C'est dans le foye qui est la vraye fontaine & source & gros tuyau, d'où se separët les branches & ruisseaux, qui courent par tout les autres parties du corps.

D. Comment appelez vous ceste separation?

R. Celles qui montent au chef & au corps s'appellent veines ascendentes, & celles qui vont en bas & aux quatre membres, s'appellent veines caues.

D. En quel endroiët se peuuent elles seigner en cas de necessité?

R. En plusieurs, au col, au larmier, au dessoubs de l'aureille, & en six autres endroiëts du chef, & au lappas, en la langue, aux flancs & aux quatre membres, & en plusieurs autres endroiëts, selon que la necessité le requerra pour la maladie de l'animal.

D. Qu'est-ce qui part du chef du cheual, & qui luy sert de membre principal?



R. J'ay des-jà parlé des nerfs, ce sont d'ocques nerfs qui baillent le sentiment, & arriuant au corps de l'animal, & par tous les autres membres principaux qui se departent du chef, & de tous les autres membres, qui contraignent vne conjoinction des os, des jambes & du corps, & de tous les autres membres.

D. Combien le cheual à il d'os?

R. Il en a deux cens cinquante sept.

D. Nommez les moy separement?

R. Tous les os qu'à vn cheual sur luy, il en a en la teste, trente neuf, quarante dents, y comprenant les crocs & les anses du test, ores qu'elles soient composées de portion d'autres os, & les deux ances plattes, qui forment le palais, & la fourchette du gosier cinq, l'eschigne en a cinquante deux, vn à la poiètrine, trente & six costes, quarante quatre os aux deux pieds jambes de deuant, & quarante à ceux de derriere, de sorte que tout le bastiment des os du corps du cheual, est composé comme j'ay dit cy-deuant de deux cens cinquante sept os, qui se representent tous ensemble, lors que l'anatomie en est dressée.

D. Quelle composition naturelle à le cheual au chef?

R. Les oreilles pour ouyr, les yeux pour veoir, les nazeaux pour sentir, & odorier, la bouche & la langue pour manger, & s'alimenter.

D. Et pour le corps quelle composition naturelle à il?

R. Le cœur, le foye & le polmon, la ratte & les genitoires, qui sont parties nobles, lors que l'vne ou l'autre est blessée, l'animal est en danger de mort, sauf aux



genitoires comme nous auons dit cy-deuant au huitième article.

D. Quelles maladies les plus communes arriuent à l'animal Cauallin.

R. Auiues, trenchées, forbure, farcin, galle & plusieurs autres accidets qui seroient long à reciter, neantmoins i'en diray aucuns, les vns s'appellent humides, les autres arrides, qui est comme vne maladie d'ardeur: autre s'appelle galle: l'autre le mal humide: aucunes ladreuries, autrement mal Elephatique, parce que les Elephans sont tousiours entachez de ce mal. Il faut reduire les signes en particulier.

D. Quel signe a la maladie humide.

R. Elle est contagieuse & proprement on l'appelle morve, elle vient souuét pour auoir le foye, & le poulmon entaché de pourriture, ou pour auoir des glandes sous & joignant le gosier, le tout prouenant de mauuaises humeurs, & les autres animaux Cauallins frians de ceste puanteur, la leichent, & en prennent la mauuaise odeur & en sont gastez.

D. Il y a plusieurs cheuaux qui jettent par les naseaux, & ne sont morveux.

R. Ceste maladie se peut aisément cognoistre par les glandes, & par la couleur de la matiere, si la matiere est verte & puante, & si elle est blanche & puante, & qu'elle face vne colle dans les nazeaux, infailliblement c'est morve. Et pour les autres qui jettent vne matiere blanche par morceaux & non puante, elle est facile à guarir.

D. Qu'est-ce que maladie seiche & aride.

R. C'est vne alteration de corps qu'on appelle com-



munement courbature, ou poussif, & vient souuent pour auoir mis le cheual hors d'aleine, & luy auoir fait trop prendre de trauail, ou quelqu'autre grand effort.

D. D'où prouiennent les auies & tranchées.

R. Souuent pour estre abreueez ayant trop chaud, & pour auoir esté trop surmenez par trauail, & aussi de mauuais vents & de mauuaises humeurs.

D. Qu'est-ce que du signe de la galle.

R. On peut raisonnablement appeler ce mal de galle, ou rogne, ou gratelle de cheual, prouenant par trop grande abondance de mauuais sang, qui cause vne demangeaison exterieure de tout le corps de l'animal, dont en prouient ordinairement la galle.

D. Comment peut venir le farcin à l'animal?

R. Pour auoir esté mal establé, ou on aura mis des porcs, ou des poulles, leur fiente est contagieuse, ou pour estre mal pensé de la main, ou trop grande abondance de mauuais sang.

D. Quelles sont les quatre maladies qui paroissent le plus, quand vn cheual monstre par action qu'il est en danger de mourir desdites maladies?

R. Cela prouient souuent par trop de ventositez, ou pour auoir mangé trop de bled, ou pour auoir beu tost apres qu'il a esté fort eschauffé, & aussi d'vn refroidissement d'vrine, pour l'auoir trop pressé & ne l'auoir laissé pisser lors que le cheual en auoit enuie.

D. Pour tascher de luy sauuer la vie, quel remede luy baillerois-tu?

R. Vn clystere confortatif, operatif & laxatif, ou vn breuuage de mesme effect, & si ie voyois que toute la maladie luy tombast sur les quatre membres, ie le  
seigne-



faignerois des quatre membres & du col, ou à autre partie neccessaire, que ie iugerois estre bon, & de son sang luy en ferois vne charge en forme de restraintif, & luy en mettrois par tous les quatre membres, & sur la croisée du roignō, & apres auoir vantoufé le dessous des sabots des pieds: ie luy applicquerois jartieres aux quatre jambes & autres reconfortements dedans & à l'entour des pieds, & principalement à ceux de deuant, & m'y gouuernerois selon la vertu & complexion du cheual, ainsi que ie verrois bon estre.

D. Par combien de parts peut venir mal à l'animal Cauallin?

R. Par nature, & aussi contre nature; & par accident, comme aux jambes: jauars, subrots, fusades, malandres, escarres, antorſes, ancastellures, efforts d'espaules & de hanches, courbes, esparuins, vessies-gons, bouteilles, castaignes, mulles, trauersines, poireaux & autres especes d'humeurs & accidents, tant au corps de l'animal, qu'és membres, & sauf l'aduis de plus sages que moy, il me semble que y comprenant les accidents susdits, que cela vient aussi-tost à l'animal Cauallin par nature, que contre nature?

D. Qu'est-ce qu'accident, & contre nature?

R. Si on meine vn cheual par les champs, ou ailleurs, & qu'il soit frappé de quelque barre ou baston, ou de trenchant, ou qu'on luy face faire plus qu'il ne doibt, c'est contre nature. Et le menant en terre plaine, s'il a la jambe rompuë d'un coup de pied d'un autre animal, ou s'il tombe luy-mesme & se rompt le col ou quelqu'autre membre, c'est par accident.

D. Qui sont les quatre elements qui baillent nour-



riture à l'homme & aux animaux?

R. Le feu, l'air, l'eau, & la terre.

D. Quelles sont les qualitez de ces quatre elements?

R. Le feu chaud & sec, l'air chaud & froid, l'eau froide & humide, la terre froide & seiche.

D. Sçais-tu bien les douze signes & leur nom?

R. Je les sçay.

D. Dis les presentement.

R. Le Belier, le Taureau, les Gemeaux, le Cancer ou Escreuiffe, le Lyon, la Vierge, la Balance, le Scorpion, le Sagittaire, le Capricorne, le Verse-eau, & les Poissons. Iceux gouvernent les douze mois de l'année, & sont placez autour du Zodiacque.

D. Sçais-tu les noms des sept planettes?

R. Ouy ie les sçay.

D. Quels sont-ils?

R. Saturne, Iupiter, Mars, Soleil, Venus, Mercure & la Lune.

D. Quelles parties gouvernent ces douze signes cy-deuant nommez?

R. Le Belier gouverne la teste: le Taureau le col: les Gemeaux les espaules & les bras: l'Escreuiffe ou le Cancer gouverne l'estomach & la poitrine: le Lyon le cœur: la Vierge le ventre & les boyaux: la Balance les reins & les fesses: le Scorpion les parties honteuses: le Sagittaire les cuisses: le Capricorne les genouils: le Verse-eau les jambes: les Poissons les pieds.

D. En quels iours est-ce qu'il faict bon saigner?

R. Le troisiéme Ianuier, & le quinziéme.  
Le quatriéme Febvrier, & le neuviéme.



Le dix-septième Mars, & le vingt-huitième.

Le dixième Avril, & le seizième.

Le premier May, & le treizième.

Le vingtième Juin, & le quinzième,

Je dis, quant à moy & mon aduis est, qu'il faut saigner en tout temps, soir & matin, en cas de necessité.

D. Quel remede donneroies-tu à vn cheual qui auroit les quatre maladies chaudes?

R. Je luy donneroy des quatres eauës cordiales, qui seront cōposées de Buglose, Sabine, autrement nommée Sauinier, Chicorée, de l'eau de vie & Endiuës.

D. Comment feroies-tu vn breuuage confortatif?

R. I'y mettrois sucre, canelle, girofle, noix muscades, safran, rigalisse, le tout en pouldre avec vin blanc, & détrempé ensemble dans vn pot de terre neuf, & en ferois vn breuuage.

D. Dequoy feroies-tu vn breuuage operatif?

R. Je prendrois du vin blanc, de l'huile d'oliue, de l'aloës, de la rhubarbe, de l'agaric, du fené, de la poudre de Duc, & du miel, de la cordiale & de toutes les choses susdites i'en mettrois la quantité que ie verrois bon estre, selon la corporance de l'animal.

D. Dequoy feroies-tu clystere laxatif?

R. I'y mettrois decoction d'aparitoire, ou de mellillo camaminne, huile d'oliue, miel, deux dragmes d'aloës & verjus.

L'agaric purge le cerueau, l'aloës purge la poitrine & le corps, la rhubarbe purge les mauuaises eauës, l'aristolochie molifie la poitrine, & la baye de laurier pour mortifier la poitrine.



## CHAPITRE III.

LES MARQUES QUE DOIVENT  
avoir les bons cheuaux.

**S**i tu veux vn cheual qui longuement te sërue,  
Pren sur tous le brun-bay, & soigneux le conserue.  
Le grizon n'est mauuais. Mais on repute beau  
Le cheual quand il est de toutes parts moreau.  
Si pour les tiens, & toy tu veux auoir monture,  
Choisi sur tous le blanc, car longuement il dure.

Le cheual doit auoir des marques signalées, tant  
pour la bonté que pour la beauté.

Il doit tenir de la femme, du bœuf, du renard,  
& du cerf.

DE LA FEMME.

Qu'il soit doux au montoir, beau de deuant, &  
belle cheueure ou crin.

D V B O E V F.

Qu'il aye les yeux beaux & gros, l'encollure belle,  
& qu'il soit court jointé.

D V R E N A R D.

Qu'il aye beau trot, les oreilles petites & belles, la  
queuë grande & touffuë.

D V C E R F.

Qu'il aye les jambes seiches, qu'il soit bien releué  
du deuant, & qu'il aye la teste seiche.

AUTRES MARQUES QUI SONT ENCO-  
res necessaires à recognoistre à vn cheual.

Les cheuaux allezans bruslez ayans le crin & queuë  
noire, sont ordinairement bons.



Les allezans clairs, pourueu qu'ils ayent les genoüils, jarrets & crin noir, & la raye noire sur le dos, ils sont bons, sauf que quelquesfois ils se couchent en l'eau.

Les cheuaux bays-clair, les fauues, les souppe de laiët, les gris-falles, moyennât qu'ils ayēt les extremittez noires, se trouuent ordinairement bons, pourueu qu'ils soient bien choisis.

Il faut que tous cheuaux ayent les pieds bons, les jambes bonnes, & point chargées de poil, les yeux bons, l'esperon & la bouche bonne, qu'ils n'ayent point les jambes grasses ny trop charnuës, qu'ils ayent bon boyau, qu'ils ne soient point bas de deuant, ny en selle, qu'ils ne soient chargez de grosses espauls, qu'ils ayent l'encollure menuë en dos de carpe, qu'ils soient bien crouppez & bien coüez, & qu'ils ne soient point chargez de ganasse, qu'ils ayent la teste belle & seiche, qu'ils soient trappus de corsage, point haut de terre: & tout ce que dessus estant, ils se trouueront bons de seruice.

Pour bien cognoistre si vn cheual a la bouche bonne, Quand il auroit la teste aussi belle & seiche comme vn cerf, & il soit fort serré au bas du Barbochet, infailiblement il aura la bouche ferme; & emportera son homme, tel mords que luy puissiez bailler. Et s'il est bien ouuert & bien fendu audit Barbochet, il aura la bouche tres-bonne.

---

*AUTRE MARQUE POUR COGNOISTRE*

*la bonne ou mauuaise venë.*

IL n'y a cheual qui n'aye vn espic au front entre les deux yeux, que si ledit espic est haut au dessus des deux



yeux, ils ont ordinairement la veuë bonne, que si le dit espic frontal est au dessous des yeux, souuent le cheual à la veuë & la teste grosse, & n'est la veuë gueres asseurée, prenez y garde & verrez qu'il est vray.

*AVTRES MARQVES POVR LES IAMBES.*

IL faut que le cheual aye le bras fort & plat & large: & encores que le reste de la jambe soit menu, pourueu qu'il ayt bon pied, le cheual fera bonne fin, le bras du cheual c'est depuis le genoüil en haut.

*Les receptes cy-apres escrites, où il y a en marge vne N. & vn B. sont receptes esprouuées par ledit Nicolas Beaugrand: & sont tres-bonnes.*

CHAPITRE IIII.

RECEPTE S.

*ET PREMIEREMENT POVR LE FARCIN.*

**P**RENEZ deux onces d'huile de laurier, & vne once de reforboir bien puluerisé, les bien mélanger ensemble, tant qu'il ne paroisse plus de ladite pouldre, puis faut trouuer le commencement de la corde du farcin iusques en la fin des autres playes, & engraisser le tout de trois en trois iours, & si à la seconde fois le farcin n'est sec & mort, il faudra de rechef l'engraisser dudit vnguent comme deuant, & trois iours apres faut auoir de l'vrine de vache, & d'une herbe appelée pied de Lyon, & par les herboristes Leontopo-



dium, & la faire bien bouïllir dans ladite vrine, puis en bassiner tousiours ledit farcin iusques à ce qu'il soit guary. La recepte en est bonne.

---

*AVTRE RECEPTÉ POVR LE FARCIN.*

**P**RENEZ l'herbe nommée Ellebore noir, & parmy ladite herbe y adiousterez de son jus mesme, mettez le tout consommer avec du vieil oinct, & ferez fort bouïllir tout ensemble, tant qu'il deuienne en vnguent, duquel vous frotterez les boutons dudit farcin, & ce apres que vous aurez tondu le poil sous lesdits boutons.

---

*AVTRE RECEPTÉ POVR LE FARCIN.*

**I**L faut auoir deux esguillettes de chien, & quelles soient rouges, & quand vous les aurez, vous cueillerez neuf fueilles d'herbe porrette, & la piller avec neuf grains de sel, & luy mettrez dans les oreilles deuant que le soleil soit leué, & les lier avec les deux esguillettes, & les y laisser vingt-quatre heures, & au bout des vingt-quatre heures luy deslierez les oreilles, & osterez ladite herbe.

---

*AVTRE RECEPTÉ POVR LE FARCIN.*

**N.B.** **S**I le cheual a du farcin au train de deuant, il faut saigner du col à jeun, & mettre deux onces d'arsenic dans de la toille cruë, & lier ledit arsenic dans ladite toille, & faut que ce soit avec de la fiscelle

neufve, & le pendre au crin du cheual: Et si le cheual a le farcin deuant & derriere, luy faudra mettre vn paquet de mesme à la queue, & le cheual ne laissera point de seruir tousiours, & neantmoins il guarira. I'en ay pensé plusieurs qui ont esté guaris avec ladite recepte.

*AVTRE RECEPTÉ POVR LE FARCIN.*

**F**AUT prendre du plantin à quatre fueilles avec la racine, enuiron cinq ou six poignées, avec vne poignée de sel, & vne grande jointée de commin, le tout meslé & pillé ensemble, & apres qu'il sera bien pillé laissez le tremper tout ensemble l'espace de vingt-quatre heures, puis pressez le tout, & ce qui en sortira de jus vous le ferez prendre au cheual le matin, & faut que ledit cheual soit saigné du col le iour auparauant, & aussi faut qu'il aye esté bridé six heures auparauant que prendre ladite medecine, & luy mettre dans les aureilles vn peu de jus & du mar, & luy lier les aureilles, puis luy laisser vingt-quatre heures, & si le mal continuë, faut derechef le faire saigner, & luy bailler le mesme breuuage pour la seconde fois.

L'Autheur assure qu'il n'y a sorte de farcin qu'il ne guarisse.

*AVTRE RECEPTÉ POVR LE FARCIN  
tres-bonne, & bien approuuée.*

**P**REMIEREMENT faut prendre d'vne herbe qui vient dans les marests, qu'on appelle Moly: il en faut prendre dix, vnze ou treize racines, selon la corporance du cheual, plus faut prendre trois choppines ou vne



ou vne pinte de vin blanc, selon la corporace du cheual, faut prendre vn plein verre de sel du plus gros, qui n'aye iamais seruy, & y en mettre selon la corporance du cheual, faut prendre vne demie choppine de vinaigre, plus ou moins, selon la grâdeur du cheual.

Plus vous prendrez de ladite herbe & la cueillerez vn jour auparauât que de la donner au cheual, & apres qu'aurez cueilly ladite herbe vous prendrez la grosse racine, & jetterez la fueille, car elle ne vaut rié, & apres

qu'aurez faiët cela, vous prendrez ladite grosse racine & la lauerez, & pillerez bien, en sorte qu'il n'y demeure point d'ordure, puis la faut bien piller le plus que pourrez. Plus faut prendre ladite racine pillée & la mettre

*L'Herbe qu'il faut est de ceste façon, & se nomme Moly d'Homere, ou autrement Plantin aquatif.*



tremper avec le sel & le vinaigre & vin blanc tout ensemble, dans vn pot de terre & le bien couvrir, de peur qu'il ne prenne l'air, & faut que le tout trépe vne nuit, puis sur les sept ou huit heures du matin, luy donnerez ledit breuuage : & apres qu'il l'aura pris vous le couvrirez bien, & le pourmenerez par l'espace de quatre heures, & sur tout qu'il ne mange point d'auoine de quatre jours, mais au lieu d'auoine luy donnerez du son de froment, & à boire de l'eau blanche, & que le cheual ne sorte de l'estable de trois jours, & passé ces trois ou quatre jours, vous le pourrez faire monter, il ne faut point faire chauffer ledit breuuage.

*L'Herbe appelée Moly, se trouue dans les marescages, elle ressemble à de la Scolopandre & à l'ozeille, sauf que la fucille est plus grande & plus large, comme la graine espendue par terre, sa fleur est semblable à celle du violier blanc, moindre, de la grandeur de la violette purpurée blanche comme laiët, sa tige est semblable à un ail, sa racine est petite & bulbeuse, qui est singulierement bonne pour guerir les ouuertures de la matrice, broyée avec unguent Irin, & appliquée en pessaire. Homere dit que Mercure a esté l'inuenteur de ceste plante, & que les Dieux pour son excellence l'ont nommée Moly. Voyez Theophraste & Dioscoride.*

Encores que toutes ces receptes pour le farcin, cy-dessus escriptes soyent bonnes, neantmoins les cheuaux n'en guarissent pas tous, & est vray que la plus asseurée recepte est de leur bailler le feu.



CHAPITRE V.

RECEPTE POVR LA GALLE AVX CHEVAVX.

N. B. **P**RENEZ vne liure de gresse de porc, vne once d'orpin en poudre, vne once de souffre, vne once d'Euphorbe, vn quarteron de mouches cantarides, le tout en poudre & bien meslé ensemble, en vnguent, & apres auoir gallé le cheual, y mettez & appliquerez ledit vnguent, & le chaufferez vn peu de loing sur ledit mal. Et quatre ou cinq jours apres pour ayder à faire sortir l'escarre, le gresserez de rechef de gresse de porc seulemēt: & apres que l'escarre sera tombée, luy lauerez le col bien net avec de la lessiue ou saumure vn peu chaude, & est ladite recepte tres-bonne.

AVTRE RECEPTE POVR LA GALLE.

**F**AVT fort galler le cheual jusques au sang, puis prendre vne pinte de vinaigre, vne once d'Ellebo-re blanc, vne once de cantarides, vne once d'Euphorbe le tout en poudre, & bien boüilly ensemble, & l'appliquer sur le mal, fort chaud, puis quand l'escarre en sera tombée, faut lauer le mal avec de la lessiue chaude, & du saun noir dedans, la recepte est tres-bonne.

AVTRE RECEPTE POVR LA GALLE.

N. B. **F**AVT galler le cheual jusques au sang, puis prendre demy-septier d'huile de channeuy, vne once de souffre en poudre, vne once & demie de poudre à canon, vne once & demie de vif argent, &

vn bien peu de vinaigre, le tout bien meslé, & long temps battu ensemble, puis l'appliquer froid sur ledit mal, & comme il sera appliqué chauffez - le vn peu de loing, avec vn fer chaud & il guarira fort bien sans y mettre rien autre chose, & faut laisser tomber l'escarre de luy-mesme.

---

*AVTRE RECEPTÉ POVR LA GALLE.*

N. B. **F** A V T tres-bien galler le Cheual, puis prendre trois demy-septiers de vinaigre, & vn quarteron d'Euphorbe, le tout en pouldre, & le faire bouïllir ensemble, & tout bouïllant en lauer ledit mal, & il guarira. Il ne luy faut point couper le crin, si on ne veut.

---

*AVTRE RECEPTÉ POVR LA GALLE.*

N. B. **A** P R E S auoir fort gallé, faut prendre demy liure d'ardoüaise en poudre, vn quarteron de souffre en poudre, & vn quarteron de beurre frais, le tout meslé ensemble en vnguent, & l'appliquer sur le mal, puis le chauffer vn peu de loing avec vn fer chaud, & il guarira.

---

*AVTRE RECEPTÉ POVR LA GALLE.*

**L** O R S que le cheual aura esté bien gallé, faut prendre quatre poignées d'herbe appelée Ouraige, & la faire bouïllir dans quatre pintes de vinaigre, & demy liure de couperose verte, & deux poignées de sel, & le



plus chaud que vous pourrez en froterez ledit mal, & il guarira.

---

*AUTRE RECEPTÉ POUR LA GALLE.*

**A** PRES qu'aurez fort gallé le cheual, prenez demy-septier d'huile de channeuy, & vne once de cantarides en poudre, & faictes tout bouïllir ensemble, & l'appliquez tout bouïllant sur ledit mal & il guarira.

---

CHAPITRE VI.

*RECEPTÉ POUR VN CHEVAL GRAS FONDV*

*à cause de la grande fièvre & chaleur qu'il a, pour le grand effort qu'il a faict.*

**F**AUT tirer beaucoup de sang du col du cheual, puis luy dōner à manger du son de fromēt, sec & mouïllé, s'il en veut manger. Et s'il se vuide beaucoup, luy faut donner souuent des clysteres de laiēt pour le rafraischir. Le memoire pour faire ledit clystere de laiēt est escript en ce present liure, mais au lieu de laiēt naturel, si on veut sera tres-bon de prendre du laiēt clair pour mettre audit clystere, & s'il est bien dégousté luy faudra faire ronger plusieurs fois avec vn nerf de bœuf d'un bon arman, qui est encores escript en ce present liure, & aussi le saigner des flancs. Et si on veoit qui luy faille bailler quelque breuuage, sera bon luy faire prendre deux fois le iour vne pinte de vinaigre melleé avec vne quarte d'eau, pour luy rafraischir le corps.

Et pour les breuuages propres à ceste maladie, faut prendre trois choppines de ptyfanne, vne once de castonnade, vne once de cordialle, vn quarteron de miel, le tout ensemble, & le faire boire au cheual.

En ceste maladie là ne faut point vser de drogues chaudes, encores que l'on y face ce que l'on peut, il en meurt plus qu'il n'en reschappe.

## CHAPITRE VII.

### *RECEPTE POVR VN CHEVAL MORVEUX.*

N. B. **S'**IL est glandé il faut luy oster les glandes, & tenir ledit cheual chaudement, & ne luy point donner d'auoine durant que le penserez, mais ne luy donnerez à manger qu'à demy son ordinaire, & le tenir tousiours bien couuert, & au lieu d'auoine ne luy donnerez que du son de froment, & à boire de l'eau blanche. Six iours apres que l'aurez esglandé luy donnerez des pillules composées de demy-septier d'eau de vie, & demy-septier de vin blanc, & trois drachmes d'aristolochie, trois drachmes d'agaric, trois drachmes de genfianne, trois drachmes de bayes de laurier, trois drachmes de myrre, trois drachmes de ratissure d'yuoirre, trois drachmes d'aloës, le tout en poudre, & mélé ensemble dās vn pot avec lesdites eau de vie & vin blanc, & le faire vn peu tiedir au feu, puis le bailler audit cheual. Et faudra continuer ce dernier breuuage encores deux fois, à sçauoir de trois iours l'vn, qui sera en tout trois breuuages, sans y comprendre les pillules cy-dessus.



C'est vne recepte que i'ay esprouuée plusieurs fois & est tres-bonne, i'en ay pensé plusieurs cheuaux, & sont tous guaris.

## CHAPITRE VIII.

*RECEPTE POVR VN CHEVAL POVSSE,*  
*tirée de monsieur de Iuigny, Escuyer.*

**F**AUT premier que luy faire rien prendre, l'accoustumer cinq ou six iours à manger son auoine avec du dable trempé.

Prenez de la graine de laurier, de l'ache, du fœnoil, du commin, du fenegré, de la fougier, & de la rigalisse, quatre onces de tout, à sçauoir demy oncé de chacun, le tout en poudre; puis separez en deux parts toutes lesdites poudres iustement par la moytié, & metrez l'une des parts avec demy liure de beurre frais, & demy poisson de laiët doux, puis le faictes boire au cheual, & le lendemain faictes le semblable de l'autre moytié des poudres, & le faictes boire au cheual.

Le troisieme iour laissez le cheual sans y trauailler, & luy donnez tant qu'il sera malade tousiours de l'eau blanche à boire, avec de la farine d'orge, & faut qu'il soit tenu bridé au moins deux heures deuant & apres que luy faire prendre ces breuuages, & ce qui s'ensuit.

Le quatrieme iour prenez demy liure de beurre frais, vne once de bon agaric, vne once de iusquiamme tout en poudre, messé avec le beurre frais, & vne once de casse, puis en faictes pillules & le baillez au cheual, puis luy donnerez demy septier de bon vin.

blanc pour luy faire aualler le tout.

Le cinquiesme iour le laisserez reposer, & le tiendrez tousiours bien couuert, & si voyez qu'il soit fort lasche du corps, & qu'il se soit bien purgé, laissez le deux ou trois iours sans luy rien faire, s'il ne s'est point purgé apres l'auoir laissé reposer vn iour seulement, donnez luy le breuuage qui s'ensuit.

Prenez deux onces de metridath, deux onces de diacartamy, deux onces de sené, & vne pinte de bon vin blanc, le tout meslé ensemble, & le baillez au cheual en breuuage: & faut que tous les breuuages que luy baillerez soient tiedes, & le cheual tousiours bien couuert & chaudement.

Et apres qu'il aura pris ledit breuuage laissez le reposer trois jours, luy donnant chacun des trois jours au milieu seulement, demie liure de beurre frais en pelotte ou pillule, les trois jours passez faut donner au cheual ce qui ensuit, & luy continuer toutes les sepmaines jusques à guarison.

Prenez vne once de bon agaric, vne once d'aloës, & demie once de myrre de leuant, vne once de diacartamy, le tout en poudre, & trois quarterons de beurre frais, & tout meslé ensemble, & en faictes pillules, & les baillez au cheual, puis luy faictes boire apres demy-septier de vin blanc, pour luy faire mieux aualler le tout.

---

*AUTRE RECEPTÉ POUR VN CHEVAL POUSSIF.*

**D**ONNEZ luy deux breuuages de trois jours l'un, faictz comme ensuit. Faut prendre vne pinte de vin blanc, trois quarterons d'huile d'olliue, vne once d'aloës,



d'aloës, vne once de regalisse, trois drachmes de colo-  
 quinte, demie once d'agaric, demie once de myrrhe,  
 trois drachmes d'aristolochie, demie once de Iusquia-  
 me, trois drachmes de bayes de laurier, le tout en pou-  
 dre, demy quarteron de terebentine de Venise, vn  
 quarteron de miel rozar, le tout meslé ensemble, &  
 faire vn peu tiedir, & le bailler en breuuage au cheual,  
 & ne luy donnerez point d'auoine de quinze jours, &  
 l'abbreuuerz d'eau blanche jusques à ce qu'il soit gua-  
 ry. Sera bon de ne luy donner guere à manger de foin,  
 mais luy donnerez de la gerbée, & son de fröment au  
 lieu d'auoine, & le tiendrez chaudement apres lesdites  
 medecines. Et le saignerez du col six jours apres les  
 medecines.

*Autre recepte tres-bonne pour vn cheual poussif.*

N. B. **F**A V T premierement purger le corps du  
 cheual: La purgation sera composée de de-  
 mie liure de beurre frais, d'vne once d'aloës, de demie  
 once de fené, de demie once d'agaric, d'vne once de  
 castonnade, de demie once de cordialle, le tout en  
 poudre, & vn quarteron de miel, le tout pestry & meslé  
 ensemble, & en ferez pillules, & les baillerez au cheual.  
 Auant que luy bailler il sera bridé deux heures, & apres  
 qu'il les aura prises sera encores bridé deux heures, ce  
 jour là il ne mangera point d'auoine, & ne sera abbreu-  
 ué que d'eau blanche, & quant au reste du regime, on  
 luy dōnera son ordinaire d'auoine tous les autres jours,  
 mais il la faudra vn peu mouïller, & le cheual trauaille-  
 ra tous les autres jours, & trois fois le jour luy donnerez

deux ou trois picottins de son de froment mouïllé, comme du mortier, & continuerez tousiours.

L'ay esprouuée ceste recepte, & est tres-bonne & tres-assurée: l'ayant faicte, auant qu'il ait passé vn mois ou six sepmaines le cheual aura le ventre aussi frais comme vn poullin, & ce sans grands frais ne grande peine.

Luy faudra aussi bailler de la gerbée au lieu de foin, sauf la nuit on luy baillera du foin.

## CHAPITRE IX.

### RECEPTE POVR LES GRAPPES ET PORREAVX.

N. B. **I**L faut tondre le poil, puis l'espace de quatre jours y appliquerez bon emplastre blanc, & au bout de ce, luy ferrerez les veines, & quatre jours apres luy lauerez avec du vinaigre chaud, puis prendrez de deux jours l'vn choppine de bon vinaigre, vn quarteron de couperose verte, vn quarteron de noix de galle, vn demy quarteron de cantarides, vne poignée de sel, le tout en poudre, & faire bouïllir tout ensemble dans vn pot, & tout bouïllant l'appliquerez sur le mal desdites grappes, & ce de trois jours l'vn, continuerez jusques à ce qu'il soit sec, & laisserez tomber l'escarre à loisir, & il guarira: Et s'il r'auerdissoit encores quelque chose, faut encores appliquer le mesme que dessus, toutesfois estant guarý de ceste presente recepte il s'en veoid fort peu à qui ils reuiennent, quand à moy ie trouue ladite recepte tres-bonne.

Et cependant ledit pensement on ne mouïllera point les jambes du cheual.



*AVTRE RECEPTÉ POVR LES GRAPPES.*

**A**PRES que vous aurez serré les veines, & six jours apres saigné de la pince du pied, vous luy tondez le poil, & le lauerez fort avec du vinaigre chaud, puis prendrez la moitié de demy-septier d'huile de noix, deux onces de vert de gris en poudre, & la moitié de demy-septier d'ancre, le tout fort meslé ensemble, puis l'appliquerez sur le mal en le frottant tout froid. Et si lesdites grappes ne seichent du premier coup, faudra recommencer de quatre jours l'vn. La recepte est assez bonne.

*AVTRE RECEPTÉ POVR LES GRAPPES.*

**F**AVT prendre vne liure de gros miel commun, trois onces de vert de gris en poudre, avec de la fleur de farine de froment, le tout meslé ensemble en vnguent, & apres auoir nettoyé lesdites grappes, y appliquerez ledit vnguent, & banderez le mal mesmes, s'il y a des porreaux parmy lesdites grappes, il les faudra couper auparauant que d'appliquer ledit vnguent, & s'il ne faut point couper de poil: & vous ne luy continuerez pas l'espace de dix ou douze jours, de deux jours l'vn, qu'il ne soit guarý. La recepte est tres-bonne.

## CHAPITRE X.

*RECEPTE POVR OSTER VN SVBROT.*

N. B. **F** A V T prendre & oster le poil sur ledit subrot, puis le bien frotter & meurtrir, apres le fort picquer & meurtrir encores, puis prenez de l'herbe appellée Verueine & vne poignée de sel, le tout bien pillé ensemble, & l'appliquez sur ledit subrot, & luy laisserez vingt & quatre heures bandé, & apres le débanderez & n'y toucherez plus. La recepte est bonne.

*AUTRE RECEPTE POVR OSTER VN SVBROT.*

N. B. **F** A V T meurtrir ledit subrot, & le picquer & decerner tout à l'entour avec vne lancette assez mediocrement, puis le meurtrir encores, & apres le frotterez d'un peu de sel, & apres y appliquerez du retoire, & luy banderez ledit subrot quelques trois heures, & lors que le débanderez luy remettrez encores vn peu dudit retoire, & le chaufferez vn peu de loing, & ledit cheual estant à l'estable sera entraué quatre jours des pieds de deuant, & au bout des quatre jours l'enuoyerez tous les jours à l'eau jusques au ventre, & si vostre cheual est de grand prix, & que desiriez que le subrot demeure bien osté, vous ne le ferez trauailler de plus d'un mois: Que l'on die ce que l'on voudra, le repos leur sera tres-necessaire.

Chacun sçait qu'un cheual encores qu'il n'ayt point



mal aux jambes, le trauail les leur faict enfler: à plus forte raison y ayant fraction par ledit subrot, il deuiendroit plus gros qu'auparauant à cause du trauail.

Le retoire qu'il faut appliquer audit subrot, sera composé d'huile laurin, de cantarides, d'Euphorbe, & d'orpin, le tout meslé en poudre, ensemble en faire vnguent, & en ferez telle quantité que voudrez, le reste seruira ailleurs.

Faut auoir pour ledit retoire vn quarteron d'huile laurin, & des autres drogues cy-dessus chacun vne once, le tout bien meslé ensemble en vnguent.

*AUTRE RECEPTÉ POUR VN SUBROT.*

N. B. **A**PRES auoir meurtry & decerné & picotté ledit subrot, comme i'ay dit à la recepte precedente, prenez vne teste d'ail, & deux gouttes de vinaigre, & le poids d'un demy escu de couperose verte, le tout fort battu & pillé ensemble, puis l'appliquez sur ledit subrot, & le bandez trois heures, puis apres l'auoir débandé ne luy faut faire autre chose, sinon se gouverner comme i'ay dit à la precedente recepte.

CHAPITRE XI.

*RECEPTÉ POUR MALANDRES.*

**F**AUT prendre du saumon noir, du populeum, & beurre frais, le tout meslé ensemble, & en appliquer de deux jours l'un sur lesdites malandres.

*AVTRE RECEPTÉ POVR MALANDRES.*

**I**L les faut froter avec vn peu d'huile de channeuy ou d'huile de noix, ou de moustarde, mais l'huile de channeuy y est tres-bonne.

## CHAPITRE XII.

*RECEPTÉ POVR VN CHEVAL QVI A  
les nerfs foullez, & feruz, & pour garder ledit  
cheual de broncher.*

**F**AUT couper vn petit nerf qui est au bout du nez dudit cheual, puis prendre vne liure de graisse de porc, & demie liure de beurre frais, & autant de Althea, & autant d'huile laurin, le tout bien meslé & battu ensemble, & en froter les nerfs dudit cheual plusieurs fois, de trois jours l'vn, & faictes que les fers des pieds où ils auront ledit mal débordent en pince, & luy ferez abattre du talon desdits pieds le plus qu'il sera possible, le cheual s'en trouuera bien.

Ce nerf qu'on coupe au bout du nez, est tres-necessaire à couper, pour empescher aussi vn cheual de se charger trop d'encollure, & de broncher, d'autant que c'est où il commence son origine, comme i'ay monstté cy-deuant en l'Examen que i'ay dressé en ce present liure.



## CHAPITRE XIII.

*RECEPTE POVR VN CHEVAL QVI A LES  
jambes enflées, ne paroissant rien que ladite enflure.*

N. B. **S**IL se peut luy faut serrer les veines, puis quelque temps apres le saigner de la pince du pied, puis apres luy baillerez vn retoite sur ladite enflure, ou bien vn feu leger, comme on verra & jugera estre le plus expedient, & le cheual s'en trouuera bien.

J'entends que la presente recepte soit appliquée à vn vieil mal, & non autrement.

## CHAPITRE XIII.

*RECEPTE POVR COVRBES ET ESPARVINS.*

N. B. **F**AUT serrer les veines au dessus & au dessous du jarret du cheual, puis baillerez le feu ausdites courbes & audit esparuin, & appliquerez sur ledit feu poix noire toute chaude, & bourre rouge par dessus lesdits feu & poix, puis quatre jours apres faudra adoucir ledit mal avec du populeum & beurre frais fondu ensemble, & lors que l'escarre sera tombée, y mettez de la chaulx en poudre, que nous appelons du blanc d'Espagne, & y continuerez jusques en fin de guarison.

## CHAPITRE XV.

## RECEPTE POVR MVLLES TRAVERSINES.

N. B. **F** A V T ferrer les veines au plat de la cuisse du cheual, & apres y appliquer autour dudit mal emplastre blanc, qui sera composé de bouïllie bien espesse, & quand elle sera cuitte y mettez dedans huile d'oliues, vn quarteron ou demie liure de terebentine commune, le tout bien mélé ensemble, puis sur vn emplastre luy banderez ledit mal, & ce de deux jours l'un, l'espace de six jours, & apres vous y appliquerez pour les faire seicher, huile de noix vn quarteron, huile d'oliues autant, & vn quarteron & demy de cire neufve jaulne, le tout fondu ensemble en vnguent, & en frottez ledit mal, & il guarira.

## CHAPITRE XVI.

RECEPTE POVR FAIRE VNE EMMIELVRE  
*pour charger vn cheual des quatre jambes.*

N. B. **F** A V T prendre deux liures de farine de froment, & la delayer avec vn petit de vin ou d'eau, & ce dans vn pot ou chaudron, comme si on vouloit faire de la bouïllie: Et lors qu'il y sera delayé y mettez demie liure de bol en poudre, vne liure de gros miel, le ferez cuire & bouïllir sur le feu, y mettez demie liure de poix noire, le tout remuer tousiours jusques à ce qu'il soit cuit & bien bouïlly ensemble, & lors qu'il



lors qu'il sera presque cuit, y mettez demie liure de terebentine commune, deux onces de commin, deux onces d'huile laurin, deux onces d'althea, deux onces de sang de dragon, deux onces de bayes de laurier, deux onces de fenegré, deux onces de farine de lin, le tout en poudre, & vne once d'huile d'aspic, le tout bien cuit, bien remué, & meslé ensemble, & puis en chargerez le dit cheual, fil faut charger plusieurs cheuaux, faudra doubler selon les cheuaux que vous voudrez charger.

Ceste emmielure est bonne pour vn effort d'espaulles aux cheuaux, & pour faire creuer les jauars, & pour nerfs ferus, & pour delasser les cheuaux, & pour attirer les humeurs, & faire des-enfler les grappes, & mulles trauerfines, & peut seruir d'emplastre blanc.

## CHAPITRE XVII.

RECEPTE POUR FAIRE VNE MEDECINE  
à un Cheual morfondu.

**F**AUT vne pinte de vin blanc, demie liure d'huile d'oliues, deux drachmes de Rhubarbe, deux drachmes d'aloës, demie once de fené, trois drachmes d'agarric, deux muscades, demie once de bayes de laurier, deux drachmes de safran, demie once de poudre de duc, demie once de cordialle, le tout en poudre & meslé ensemble, & vn quarteron de miel, le tout chauffé dans vn pot, puis le bailler en breuuage au cheual.

Auparauant que luy bailler ladite medecine: Il faut qu'il soit bridé trois heures, & trois heures apres: le jour qu'on luy baillera, il ne mangera point d'auoine, & ne

boira que de l'eau blanche, & le tiendrez chaudement quatre ou cinq jours, & quand on luy baillera son auoine on y mettra chaque fois vne once de senegré dedás.

## CHAPITRE XVIII.

*RECEPTE POVR FAIRE DES PILLVLES POVR  
purger vn Cheual.*

**I**L faut trois quarterons de beurre frais, vn quarteron de miel, vne once d'aloës, vn quarteron de castonnade, vne once de senegré, demie once d'agaric, le tout en poudre & bien pestry, & meslé ensemble, & en faire pillules & les bailler au cheual.

Et pour son regime de viure, faut faire comme à la recepte precedente.

Si c'est vn petit cheual, ne luy faut bailler que les deux tiers.

## CHAPITRE XIX.

*RECEPTE POVR FAIRE DES PILLVLES POVR  
vn Cheual qui touffe, & est morfondu.*

**N. B. F**AUT prendre demie liure de beurre frais, vn quarteron de miel rosar, vne once d'aloës, vne once de sené, trois drachmes de rhubarbe, deux drachmes de coloquinte, trois drachmes de bayes de laurier, deux drachmes de saffran, vne once de cordiale, vn quarteron de poudre de duc, le tout en poudre & bien meslé ensemble, avec deux onces de metri-dath, & en faire pillules, apres auoir le tout bien pestry



& meilé, & les bailler au cheual. Ceste recepte purgera, & si elle échauffera le cheual. Pour son regime de viure faut faire comme aux receptes precedentes.

Si c'est vn petit cheual, luy en faut bailler les deux tiers, & à proportion de sa force & grandeur.

---

## CHAPITRE XX.

*Recepte pour vn Cheual qui a le ventre alteré.*

N. B. **P**RENEZ vne pinte de vin blanc, vne liure d'huile d'oliues, vne once de terebentine de Venize, deux onces de metridath, deux onces de castonnade, deux onces de casse preparée, demy-septier de laiët d'amandes douces, & la moitié de demy-septier de bon verjus, le tout meilé ensemble dans vn pot, & le faire vn peu chauffer & tiedir, puis le bailler en breu-uage au cheual, & le tenir chaudemét cinq ou six jours. Pour le regime de viure faut faire comme aux receptes precedentes. Si c'est vn petit cheual luy en faut bailler les deux tiers, & à proportion, comme dit est.

---

## CHAPITRE XXI.

*Recepte pour vn Cheual qui a estrangillon ou gourme.*

N. B. **F**AVT vne peau de mouton, & la mettre sous le gosier du cheual, & à l'entour du mal pour luy tenir chaleur, puis prenez basilicum & vieil oinct, & d'Althea de chacun vn quarteron, & vne once d'huile laurin, le tout battu ensemble, puis en

frottez le mal jusques à ce qu'il soit prest de percer, & quand il sera percé, y faut mettre tentes de basilicum pour trois ou quatre jours, puis l'acheuer de péser avec tentes d'Egyptiacum, jusques à ce qu'il soit guarý, & durant la maladie du cheual le faut traicter de bon foin & de son de froment, l'abreuuer d'eau blanche, & tenir chaudement.

## CHAPITRE XXII.

*Recepte pour faire vn Arman à vn Cheual malade.*

N. B. **F**AUT prendre vne demie liure de miel rosar, de la mie de pain blanc rassis, en poudre; & en mettre dans ledit miel, avec vne demie once de muscade, demie once de cordiale, & demie once de canelle, le tout en poudre, & bien meslé ensemble, le mettre dans vn pot avec vn peu de vinaigre rosar, & en bailler à plusieurs fois à ronger au cheual au bout d'vn nerf de bœuf, & luy donnera appetit.

## CHAPITRE XXIII.

*Recepte pour vne medecine confortatiue à vn Cheual fort malade.*

N. B. **F**AUT prendre vne pinte de bon vin blanc, vne once de sucre candy, vne once de canelle, demie once de cloux de giroffle, trois drachmes de safran, deux onces de castonnade, le tout en poudre, & deux onces de metridath, vn quarteron de miel rosar, le tout meslé & tiedy sur le feu dans vn pot tout



ensemble, puis le bailler en breuuage au cheual, & le tenir chaudement. Sera bon aussi de luy donner souuent de l'arman cy-deuant escript.

## CHAPITRE XXIII.

*RECEPTE POUR FAIRE VN CLISTERE LAXATIF.*

N. B. **I**L faut prendre trois poignées d'herbe appelée Apparitoire, ou trois poignées de mellilot, ou trois poignées de camamine, de l'une des trois herbes en ferez bouillir avec de l'eau trois poignées, puis comme elle aura bien bouilly vous en passerez dans vn linge enuiron vne pinte dans vn pot, puis y metterez demie liure d'huile d'oliues, vne choppine de verjus, vn quarteron de miel & deux onces de casse, le tout meslé ensemble, & à demy tiede le bailler au cheual.

## CHAPITRE XXV.

*Recepte pour faire vn clistere restraignant & r'afraischissant.*

N. B. **F**AUT prendre mesme decoction que dessus, vne pinte, & la refroidir, puis prendrez vne pinte de lait de vache, & y meslerez les jaunes de trois œufs, le tout ensemble ferez tiedir, puis le baillez au cheual.

Ce dernier clistere est bon pour restraindre vn cheual qui se vuide trop ceste maladie de trop vuider s'appelle proprement fringalle, & elle prouient de manque de force & deffaut de nature. S'il ne se referre pour vn clistere, faudra redoubler.

## CHAPITRE XXVI.

*RECEPTE POUR VN CHEVAL QVI A CONTRE-COEVR.*

N. B. **P**OVR les premiers appareils, faut prendre demie liure de graisse de porc, autant de vieil oinct, & autant de basilicum, le tout bien battu ensemble, & en frotterez le mal plusieurs fois, jusques à ce qu'il le faille percer, & quand il aura esté percé aux premiers appareils, y metterez des tentes d'vnguent blanc, qui sera composé d'un quarteron de terebentine commune, le jaune d'un œuf, quelque peu d'huile rosar, le tout bien mélé ensemble.

Et aux autres appareils d'apres y metterez tentes d'Egyptiacum, jusques à ce qu'il soit guarý.

## CHAPITRE XXVII.

*Recepte pour vn Cheual qui est espaulé & entre-ouuert.*

N. B. **A**BATTEZ le cheual sur le costé qui n'est point blessé, puis liez la jambe boiteuse avec vne platte longe, le bout de ladite platte longe sera lié à quelque arbre ou pillier, distant du cheual de deux ajambées, & fort pres de terre: Et au milieu de ladite longe y aura quelqu'un, qui fera vn moulinet avec vn baston, tournant au milieu de ladite longe peu à peu: Et cependant vn autre homme avec de l'eau fraische de sa main, ou bien son pied tout nud, frottera de toute sa force, en appuyant & auallant en bas depuis le haut de ladite espaule, jusques à la poincte d'en-



bas de ladite espaule, & en ce faisant vous remettrez les os des joinctures qui estoient démis, & apres qu'aurez fait ce que dessus, faut faire leuer le cheual le plus doucement que pourrez, puis le saigner de la jambe malade, & luy mettrez vn pattin à l'autre pied, & l'entrauerz des deux pieds de deuant, quinze jours au moins sans qu'il se couche chargerez & frotterez ladite espaule, & y mettrez de bons emplastres.

Et si voyez ladite espaule de deux ou trois jours l'vn, l'espace de douze ou quinze jours, & apres luy osterez ledit emplastre avec bains & estuues faicts de bonnes herbes, & quelques jours apres lesdits bains luy frotterez ladite espaule des quatres vnguens chauds, encore quelque espace de jours, & il guarira.

Je l'ay esprouué à cinq ou six cheuaux.

---

*AVTRE RECEPTÉ POVR LE MESME.*

N. B. **L**ORS que le cheual est boiteux de l'effort de l'espaule, il est bon de le faire nager, puis le saigner & l'entrauer des deux pieds de deuant, puis le laisser trois sepmaines sans coucher, pendant lequel temps on frottera ladite espaule avec de l'huile d'olives seulement: le premier coup on en prendra demie liure, & à rebours poil on frottera l'espaule & poiétral bien fort l'espace de demie heure, le lendemain on frottera encores demie heure fermement ladite espaule sans y rien mettre, & continuerez de le frotter tousjours l'espace de huit ou dix jours, quant à l'huile d'olives, de trois jours l'vn on en prendra vn quarteron

pour y appliquer en le frottant, & les autres jours à sec: & au bout des huit ou dix jours l'espaule sera enflée jusques au genoüil, vous degreisserez tout l'huile & y appliquerez vne charge de restraintsif, & y adjousterez demie liure de terebentine commune pour le mieux faire tenir, & le lendemain & les autres jours d'apres au lieu d'oster ledit restraintsif, prendrez du vinaigre, & estuerez ladite espaule par dessus ledit restraintsif, & vn peu du poil tombera peu à peu, & lors que l'enflure n'y sera plus, enuoyez le cheual tout doucement à l'eau du commencement, & il guarira. Ceste recepte est tresbonne & esprouuée, & couste peu.

Pour vn cheual entre-ouuert, le dernier remede est de luy broyer l'espaule, & de l'entamer à la poincte de l'espaule, & y appliquer vne ortie de cuir, ou vn seton pour luy attirer les humeurs, & luy laisser l'espace de quinze jours, ou enuiron.

---

## CHAPITRE XXVIII.

*RECEPTE POUR VN CHEVAL QUI A VNE  
maladie comme fol, se donnant de la teste contre les mu-  
rilles, & est comme enragé.*

N. B. **F**AUT prendre des boutons de fer, & les chauffer tout rouges, puis faire avec le feu vn trou au haut du front du cheual, & au dessous du toupet du crin, & vn dans le toupet, puis quatre autres trous avec ledit feu au trauers du col dans la criniere, à sçauoir, deux d'vn costé & deux de l'autre, puis adoucierez lesdits trous d'vnguent rosar, & saignerez ledit cheual



cheual du col, & il guarira: Ceste recepte est éprouuée. On appelle ceste maladie vercoquin, & les Italiens l'appellent vermiforme, à cause qu'il s'est trouué quelques fois le long du col & crin entre cuir & chair, vn ver vif, qui a la poincte de son bec sur le trou de la ceruelle du cheual, & lors qu'il vient à mordre ladite ceruelle, il le faißt mourir enragé. Le principal remede pour tuer ledit ver est la recepte cy-dessus, parce que les boutons dudit feu le coupent & le tuent.

## CHAPITRE XXIX.

## RECEPTE POVR VN CHEVAL ESHANCHE.

N. B. **F**AUT faire nager le cheual, ou faire tirer vne espine de la hanche dont il sera boiteux, puis le saigner de la cuisse, & le charger plusieurs fois d'une bonne emmiellure grasse, & mettre vn patin à l'autre pied, & qu'il ne se couche point l'espace de douze jours au moins. Et apres ledit temps le faudra décharger & bien nettoyer avec de bons bains, & s'il n'est guarý luy faudra appliquer sur le mal vn chyroënne tout chaud.

Lequel chyroënne sera composé d'une demie liure de poix noire, de deux onces de mastice, d'un quarteron de galbanon, de demie liure de poix grasse, de demie liure de terebentine, le tout fôdu dâs vn pot ensemble, & à demy chaud l'appliquerez sur la hanche & croisée des reins dudit cheual, & au bout de huit ou dix jours s'il n'est guarý luy osterez ledit chyroënne, & frotterez le mal d'vnguent chaud, lequel vnguent sera composé de

demie liure d'huile laurin, & de demie liure de Althea, & de demie liure de graisse de porc, le tout meslé ensemble en vnguent en frotterez ledit cheual. La recepte est bonne.

---

### CHAPITRE XXX.

*Recepte pour faire venir du boyau à vn Cheual, pournen qu'il soit jeune.*

N. B. **L**E cheual a aupres des bourses deux petites cordes, qui luy tiennent depuis les bourses jusques au gros du ventre, à sçauoir vne de chacun costé, laquelle corde il faut rompre avec le doigt, chose qui se faict fort aisément à ceux qui l'ont practiqué, & quand les aurez rompuës il faut frotter l'endroict plusieurs fois avec beurre frais & populeum meslé ensemble, ce faict le boyau luy viendra.

---

### CHAPITRE XXXI.

*Recepte pour les playes arrinées aux Cheuaux.*

N. B. **F**AUT prendre vne once d'huile de vers, deux onces de terebentine, deux onces de miel, le tout meslé ensemble, & en appliquer sur la playe & elle guarira.

---

### CHAPITRE XXXII.

*RECEPTE POUR VN CHEVAL QVI A LA veue chargée, & non tayée.*



N. B. **I**L faut ferrer les deux veines du larmier, puis l'au deffoubs des yeux luy faut faire deux cauterres, ſçauoir luy fendre la peau, puis la decerner juſques aupres des yeux, & mettre à chacun vn thuyau de plume, coupée à demy par le milieu, puis pluſieurs fois le jour les faire purger avec le doigt, & adoucir leſdites playes de populeum, & lauerez les yeux trois fois le jour avec de l'eau d'éclaire, & du jus d'herbe appellée de l'ache, & quelques xv. jours apres luy oſterez les thuyaux de plume, & luy lauerez ſouuent les yeux d'eau fraiſche, le remede eſt tres-bon.

*Autre recepte pour le mal des yeux qui ſont chargez, & quand il commence à y venir des tazes ou dragons.*

N. B. **P**RENEZ du canfre, ou du ſel armoniac, ou du ſucré candy, le tout en poudre, l'vn des trois ſont bons à ſouffler trois fois le jour dans l'œil du cheual, le ſel armoniac eſt le meilleur.

*Autre recepte pour vn Cheual qui a eu quelque coup ſur l'œil.*

N. B. **F**AUT ſaigner le cheual du col ou du larmier, du coſté qu'il aura eu le coup, puis prenez de l'eau roſe & blancs d'œufs, & battrez le tout enſemble & en eſtuuerez pluſieurs fois l'œil, & y mettrez à l'entour du reſtraintif pluſieurs fois. Et quand il ſera vn peu amandé vous continuerez pluſieurs fois le jour à le baſſiner & eſtuuer d'eau fraiſche venât du puits, juſques à ce qu'il ſoit guarý. S'il y demeure quelque blancheur appliquez y l'vne des poudres de la precedente recepte.

## CHAPITRE XXXIII.

*RECEPTE POUR VN CHEVAL ENCLOVE.*

N. B. **S**I-TOST que le cheual est picqué faut retirer le clou, & prendre vn peu du crin de la queue du cheual, & l'entortiller autour de la pointe du clou & jetter le tout dans le feu, & il ne sera point boiteux. Et pour l'heure ne faudra point mettre de clou au droict de ladite picqueure.

## CHAPITRE XXXIIII.

*Recepte pour les talons encastellez, & pour attaintes sourdes.*

N. B. **F**AUT bien molifier & adoucir les pieds du cheual de bons remolades, puis le dessoller & luy fort presser les talons pour les luy élargir, & lors que luy aurez r'affermy la solle, tiendrez lesdits pieds gras avec vnguent rosar & quelques reconfortements dans lesdits pieds, & il guarira.

## CHAPITRE XXXV.

*Recepte pour vn Cheual qui a vne forme sur le sabot.*

N. B. **F**AUT dessoller le pied, puis le laisser beaucoup saigner, puis l'ayant estanché prendrez vn linge large de trois doigts, & ferrerez ladite forme bien fort l'espace de deux jours, pour la r'enuoyer d'où elle est venue. Et si elle ne se guarit pour le dessoller,



apres que la folle sera r'afferemie, faudra baillervn retoire ou le feu sur ladite forme : quand à moy ie trouue le feu meilleur pour le guarir que le retoire, aussi i'observe que au bout de huit jours que ie luy ay baillé le feu, luy faut nettoyer la playe avec du vinaigre chaud, puis prendre deux onces de noix de galle, deux onces de cantarides, deux onces de couperose verte, le tout en poudre & meslé ensemble, & faire bouïllir parmy demy-septier de bon vinaigre, & tout bouïllant l'appliquer sur le mal, & de trois jours l'vn faire le semblable, en trois fois ladite forme s'en ira en poudre, & sera le cheual guarý.

## CHAPITRE XXXVI.

*Recepte pour mal de pied, où il y a os de graisse ou filandres tenans au petit pied.*

N. B. **S**I c'est par cloux de ruë, ou encloüure, ou solbature, & que l'on soit quelquesfois contrainct les dessoller, il le faudra faire, & apres faire bonne ouuerture, cela estant fait y aplicquerez sucre blanc, avec huile rosar meslé ensemble, jusques à ce que les filandres & os de graisse soient pourries, & apres que la playe sera viue & belle, y applicquerez huile de chan-neuy, avec vn peu d'Egyptiacum parmy ladite huile, le tout tant soit peu chauffé, & le cheual guarira : Le remede est tres-bon. Et aussi pendant que le penserez y mettrez de bons restraintifs autour du pied.

## CHAPITRE XXXVII.

## RECEPTE POVR LES SAIMES.

**S'**ILs prouiennent d'une encastellure de talons, faut dessoler le pied de ladite saime, estant fenduë jusques au poil, luy faut ferrer la veine dans le boulet, puis luy bailler le feu le long du poil sur ladite saime, & le bourrer de bourre & poix noire : l'escarre estant tombée, y applicquerez Egyptiacum noir, jusques à ce qu'il ait formé vn cercle de nouvelle corne, & tenir tousjours gras d'unguent rosar ledit pied, & elle s'aualera & guarira. Ces maladies-là sont vn peu longues.

## CHAPITRE XXXVIII.

## RECEPTE POVR FAIRE EGYPTIACVM NOIR.

**N. B. F**AUT prendre deux liures de gros miel, vn quarteron de vert de gris, vn quarteron de noix de galle, vn quarteron de couperose verte, le tout en poudre, & melle ensemble d'as vn pot de terre neuf, pour le tout faire boüillir & cuire: & lors qu'il commencera à boüillir, apres l'auoir bien remué l'osterez de dessus le feu & le laisserez froidir, d'autant que si le laissez trop boüillir, il deuiendrait rouge, & n'en seroit pas si bon. Cét Egyptiacum noir est tres-bon pour faire resoulder la corne d'un cheual, lors que la matiere aura monté au poil, & aussi pour faire reformer la corne à vn cheual lors qu'il aura esté dessolé: il ne luy en faut nettre qu'au troisieme appareil apres le dessollement.



## CHAPITRE XXXIX.

*AVTRE RECEPTÉ POVR FAIRE EGYPTIACVM.*

N. B. **F** A V T prendre deux liures de gros miel, vn quarteron de vert de gris en poudre, deux onces de couperose verte, & vn peu de vinaigre, le tout meslé ensemble dans vn pot, & le faire bien fort bouillir & cuire, puis le laisser froidir.

## CHAPITRE XL.

*Recepte pour faire remolade & reconfortement pour les  
pieds solbattus.*

N. B. **P** R E N E Z vn quarteron de sain de porc, vn quarteron de tar, demy quarteron de poix grasse, demy quarteron de terebentine, le tout fondu & meslé ensemble, & emplir les pieds du cheual, & luy mettre sur la corne bon remolade, puis le laisser reposer quatre ou cinq jours.

## CHAPITRE XLI.

*RECEPTÉ POVR FAIRE VN RETOIRE.*

**I** L faut prendre vn quarteron d'huile laurin, demy quarteron d'orpin, demy quarteron de cantarides, demy quarteron d'Euphorbe, le tout en poudre & bien meslé ensemble, & en faire ledit retoire.

## CHAPITRE XLII.

*Recepte pour faire un unguent, & faire venir la corne  
aux pieds des Cheuaux.*


**P**RENEZ trois liures de graisse de porc, deux liures de surpoint, vne liure de terebentine, demie liure de cire jaune neufve, trois quarterons d'huile d'olliue, le tout mélé & fondu ensemble, & en faire ledit unguent, & en frotter le pied sur le haut du sabot, près le poil seulement.

*AUTRE RECEPTÉ POUR LE MESME.*

**F**AUT prendre du sureau plusieurs poignées, & autant d'hiebles, le tout bien pillé ensemble, & prendre vne pinte ou enuiron du jus, puis prendre trois liures de suif de mouton, vne liure de terebentine, vne liure de miel, vne liure d'huile d'olliue, demie liure de cire neufve, le tout faire bouillir ensemble l'espace d'un quart d'heure, puis le laisser refroidir, & en frotter les pieds du cheual, comme est dit en la recepte cy-dessus.

*Sur toutes choses, le nom de Dieu soit Loué.*





## FIGVRES DES OS DV CHEVAL.

**A** Celle fin que le Marefchal ou autre perfonne curieufe de ſçavoir, ſçache le nombre & les noms des os & parties deſquelles le Cheual eſt conſtruiſt & compoſé ; i' ay trouué fort à propos d'en faire vne briefue deſcription, & commencer premieurement par le nombre & les noms propres des os & parties de la Teſte, & puis de la Fourchette, de l'Eſchine, du Coffre, de la Poitrine, des Iambes & pieds de deuant & de derriere, comme il appert.

## FIGVRE DES OS DE LA TESTE DV CHEVAL.

A Le deuant de la teſte . D Le marteau .  
B Le deſſouz de la teſte . E L'enclume .  
C La maſchoire baſſe . F L'eſtrier .



# LE NOMBRE ET LES NOMS DES OS DE LA TESTE DV CHEVAL.

a	Le front.	u	Les dents maschelieres.
b	Cousture arcuale.	1	L'os de l'aureille.
c	Le sommet.	2	Le creux.
d	Cousture droiſte.	3	Le thuyau.
e	Cousture trauerſante du sommet.	4	Le pierreux.
f	Les templiers.	A	Le deuant de la teſte.
g	Cousture cheuroniere.	B	Le deſſoubs de la teſte.
h	Les anles du Teſt.	C	La maſchoire baſſe.
i	Cousture eſcailleuſe.	D	Le marteau.
l	Le Tupet.	E	L'enclume.
m	L'os maſchelier.	F	L'eſtrier.
n	L'os du petit coin de l'œil.	5	L'os de la nucque.
o	L'os du grād coin de l'œil.	6	L'os diuers.
p	Les pinnes.	7	L'entonnoir.
q	La cousture pinnale.	8	La gouttiere.
r	Le palais.	9	Les os du muſſe.
s	Les dents trenchantes.	10	Les eſponges templieres.
t	Les crochers.	11	Les quatre Chartouches portions de l'entonnoir.





# FIGURE DE LA FOVRCHETTE.



## LES PARTIES ET OS DE LA FOVRCHETTE.



a La Fourchette.



b Les petits Pylons.




c Les Branches.







## FIGURE DE L'ESCHINE.

LE NOMBRE ET LES NOMS DES  
PARTIES DE L'ESCHINE.

1. 2. 3. 4. 5. 6. 7. Les nœuds du col.

1. 2. 3. 4. jusques à 18. Les nœuds  
du coffre avec leurs saillies.

a b c d e f Les nœuds des flancs.

1. 2. 3. 4. 5. 6. Les nœuds de la croupe

1. 2. 3. jusques à 15. Les nœuds de la  
queue.

16. Le tendrô du bout de la queue.

G iij





## FIGURE DV COFFRE.



LE NOMBRE ET LES NOMS  
DES PARTIES DV COFFRE DV  
CHEVAL, ET DE LA POICTRINE.

a Les clauettes.

1. 2. 3. 4. 5. 6. jusques à 18. Les nœuds avec leurs  
faillies & les costes jointes ensemble.

b L'os de la poitrine liant les costes.

c L'os de la poitrine séparé des costes.

d L'Espieu.



LE NOMBRE ET LES NOMS DES  
PARTIES DE LA IAMBE ET  
PIED DE DEVANT.

a	Le palleron.	h	Les deux poinçons.
b	Le bras.	i	Le pasturon.
c	Le sous-bras.	l	Les os du boulet.
d	Le coude.	m	L'os de la corone.
e	Le sous-coudier.	n	Le noyau.
f	Les os du genouil.	o	Le sous-noyau.
g	Le canon.	p	Le sabot.

LE NOMBRE ET LES NOMS DES  
PARTIES DE LA IAMBE ET  
PIED DE DERRIERE.

a	L'os de la hanche.	h	Le canon.
b	L'os de la cuisse.	i	Les deux poinçons.
c	L'os ferme.	l	L'os du pasturon.
d	L'os quarré.	m	Les os du boulet.
e	La poulie.	n	L'os de la corone.
f	L'arrest.	o	Le noyau.
g	Les os quarez sous la poulie.	p	Le sous-noyau.
		q	Le sabot.



FIGVRE DES IAMBES ET PIEDS  
DE DEVANT ET DE DERRIERE.

*Le pied de devant*



*Le pied de derriere*






**A** PRES auoir monstté le nombre & les noms des os & parties du Cheual par parcelles, ie les veux r'assembler, & en faire vne supputation generale: La teste est composee de quarante-neuf os, & de quarante dents, y comprenant les anes du test, combien qu'elles soient composees de portions d'autres os: Les deux aduâces plattes qui donnent forme au palais, & la fourchette du gosier, en ont cinq: L'eschine en a cinquante-deux: Vn à la poiêtrine: Trente-six costes: Les deux pieds de deuant, ont quarante-quatre os, & les deux de derriere quarante. De maniere que toute la structure des os du corps du Cheual contient deux cents cinquante-sept os.








A N A T O M I E  
O V  
FIGVRE DE TOVS LES OS DV  
CHEVAL EN CORPS.

*Le Corps des os du Cheval*









# POVTRAICT DV CHEVAL A V N A T V R E L.




**A**YANT cy-deuant exactement demonstéré les parties separées du Cheual, icelles rejointes & r'assemblées pour en faire vn Schœlete, i'ay estimé qu'il estoit à propos de recourir ledit Schœlete de sa peau, pour designer la perfection d'un Cheual, & monstrier comment il doit estre pour estre beau & estimé.



**C**ESTE representation ne sert que pour monstrier  
commét vn petit poullain est placé & gisté dedans  
le ventre de la lument, ce que le Mareschal confide-  
rant, verra les endroits ausquels il se doibt garder de  
toucher, de peur d'offencer le petit poullain, quand  
il est necessaire de penser vne Caualle qui est pleine.







POVRTRAICT DE LA CAVALIE  
MORTE ET OVVERTE, AVEC  
SON POVLAIN.



*Privilege du Roy.*



LOUIS PAR LA GRACE DE DIEU ROY DE FRANCE ET DE NAVARRE; A nos Amez & feaux Conseillers, les Gens tenans nos Cours de Parlement, Preuoost de Paris, Seneschal de Lyon, Bailly de Roüen & autres nos Iusticiers & officiers qu'il appartiendra, Salut. Nostre bien amé Claude Hulpeau, Imprimeur & Libraire en nostre bonne ville de Paris; No v s a faict humblement exposer qu'ayant recouuert vn traicté, intitulé *le Marechal Expert, traictant de la nature & marques des beaux & bons Cheuaux, de leurs maladies & remedes d'icelles, description de leurs parties & ossemens, le tout représenté & enrichy de figures*, il l'imprimeroit volontiers pour le faire veoir au public, s'il nous plaisoit le gratifier de priuilege: No v s inclinans à l'humble supplication dudit Hulpeau, luy A v o n s permis & permettons par ces presentes imprimer ou faire imprimer par qui bon luy semblera ledit traicté, pour le temps & terme de neuf ans, pendant lesquels, No v s auons faict & faisons expresses inhibitions & deffences à tous Libraires, Imprimeurs & autres dans cestuy nostre Royaume, terres & Seigneuries de nostre obeissance d'imprimer, faire imprimer, vendre ny debiter ledit traicté en quelque volume ou caracteres que ce soit, sans le gré & consentement dudit Hulpeau, sur peine de mil liures d'amande applicables, moytié à No v s, l'autre audit Hulpeau, confiscation des exemplaires, despens, dommagés & interests, lesquels à ceste fin il pourra faire saisir par tout; V o u l o n s que l'extrait des presentes apposé au commencement ou à la fin desdits liures tienne lieu de deuë signification: S i v o u s M A N D O N S que du cōtenu en icelles vous fassiez & souffriez jouir & vser ledit Hulpeau, plainement & paisiblement, sans permettre ny souffrir qu'il luy soit faict, mis ou donné aucun empeschement au contraire: M A N D O N S au premier nostre Huissier ou Sergent pour l'exécution desdites presentes, faire tous exploits & saisies requises & necessaires, sans pource demander, *placet, visa ne pareatis*: Nonobstant Clameur de Haro, Chartre Normande, Priuileges & Lettres à ce contraires: C A R tel est nostre plaisir. Donné à Paris le huietiesme jour de Ianuier, l'An de grace mil six cens dix-neuf, & de nostre regne le neufiesme.

*Par le Roy en son Conseil.*

DE LALANE.

Acheué d'Imprimer le 26. jour de Ianuier 1619.



